

Mpango wa Serikali wa Kusaidia Wakimbizi Makazi Mapya kwa Wakimbizi Kanada

Taarifa Muhimu

Unataka kuja Kanada na maombi yako yamefanyiwa mapitio ya awali na maafisa wa Kanada. Sasa unajiuliza/ungependa kujua ni nini kitafuata. Kuchaguliwa kwako kama mkimbizi unayestahiki ni hatua muhimu katika mchakato wa makazi mapya. Lakini si hatua ya mwisho.

Hizi ni taarifa kuhusu hatua zinazofuata katika mchakato, na kuhusu Kanada.



© Kwa Heshima ya Malkia wa Haki wa Kanada, anayewakilishwa na Wizara ya Uhamiaji, Wakimbizi na Uraia, 2019

Ci44-18/2019Sw-PDF
978-0-660-32870-6
2627-11-2019

Mpango wa Serikali wa Kusaidia Wakimbizi

Unaweza kupatiwa makazi Kanada chini ya Mpango wa Msaada wa Serikali wa Wakimbizi. Hii inamaanisha kwamba umependekezwa Kanada na Shirika la wakimbizi la Umoja wa Mataifa (UNHCR) au na shirika jengine la rufaa.

Ikiwa maombi yako yatakubaliwa, Serikali ya Kanada au mkoa wa Quebec watakusaidia kifedha wakati wa mwaka wako wa kwanza nchini Kanada. Msaada unaofadhiliwa na Serikali pia hutolewa na mashirika yanayotoa huduma kwa wageni Kanada yanayoitwa mashirika ya kutoa huduma. Mashirika haya yanataka kukusaidia ili uzowee maisha ya Kanada.

Mchakato wa maombi - hatua zinazofuata:

- Wewe na familia yako ni lazima mpimwe afya kabla ya kuja Kanada.
- Gharama za kufanya vipimo, pamoja na huduma nyengine za matibabu kabla ya kuondoka, zinalipiwa na [serikali](#) ya Kanada.
- Inaweza kuchukua miezi kadhaa baada ya usaili wako kabla ya kutakiwa kwenda kufanya uchunguzi wa afya. Shirika la Kimataifa la Uhamiaji (IOM) au na ofisi ya [Uhamiaji, Wakimbizi na Uraia Kanada](#) (IRCC) watawasiliana na wewe kwa taarifa zaidi kama ikiwa bado hujapima afya yako.
- Ni lazima pia ufanyiwe uchunguzi wa historia wa masuala ya uhalifu na usalama. Hii ni kuhakikisha kuwa hujawahi kufanya uhalifu mkubwa, na wala wewe si hatari kwa usalama wa Kanada.
- Maafisa wa Kanada watapitia maombi yako na kuamua kama umefaulu uchunguzi wa afya, usalama na uhalifu. Hakuna haja ya kuwasilisha maelezo yoyote ya ziada mpaka uambiwe.
- Kama hutofaulu uchunguzi wako wa kiafya, na wa mambo ya usalama na uhalifu, unaweza usichaguliwe kuja Kanada.
- Kama utafaulu uchunguzi wako wa kiafya, usalama na uhalifu, Kanada watawaomba Shirika la Kimataifa la Uhamiaji, au shirika jengine, kukusaidia kujiandaa kuja Kanada.
- Katika baadhi ya nchi, utalikwa kuhudhuria madarasa ya bure ya maelekezo kabla ya kuondoka. Madarasa haya ya bure, yanaitwa Maelekezo ya Kanada kwa Nchi za Nje, yanalipiwa na serikali ya Kanada na hutolewa na Shirika la Kimataifa la Uhamiaji (IOM). Katika mafunzo haya, utajifunza kuhusu Kanada na huduma zinazopatikana za kukusaidia baada ya kufika kwako.



Kuondoka kuja Kanada:

- Mara baada ya kufaulu uchunguzi wote na hati zako ziko tayari, safari yako ya Kanada itaandaliwa.
- Katika baadhi ya nchi unaweza ukahitaji kulipia ada ya kuondoka kwenye serikali ya nchi ambayo ulikuwa unaishi kabla ya kuondoka. Wakati unahitajika kulipia ada hii wewe mwenyewe, Shirika la Kimataifa la Uhamiaji linaweza kukusaidia katika mchakato huu.
- Kama huna pasipoti au hati nyingine halali za kusafiria, serikali ya Kanada itakupa hati ili uweze kusafiri kuja Kanada.
- Serikali ya Kanada itatoa mkopo kufidia gharama za kusafiri kwako kuja Kanada.
- Fedha hii ni mkopo, ambayo ina maana kwamba utatakiwa kulipia serikali kiwango chote ndani ya miaka mitatu (3) hadi minane (8), kulingana na kiwango cha mkopo.
- Lazima uanze kulipia mkopo ndani ya mwaka mmoja (1) baada ya kufika Kanada.
- Utapewa msaada wa kwenda uwanja wa ndege na kushughulika na maafisa wa uhamiaji wakati unapoondoka.
- Kusafiri kwenda Kanada mpaka kufika kwenye kituo chako cha mwisho inaweza ikawa ni safari ndefu sana. Unaweza kubeba vitafunio vyako kwa sababu utapaswa kulipia chakula chako kwenye ndege au uwanja wa ndege.

Kufika Kanada:

- Utakapofika Kanada kwa mara ya kwanza, wafanyakazi kutoka shirika la kutoa huduma, ikiwa ni pamoja na mkalimani kama anahitajika, watakupokea utakaposhuka kwenye ndege na kukusaidia katika taratibu za uhamiaji.
- Ikiwa unaunganisha ndege, watakuongoza mpaka kwenye kituo chako cha mwisho. Pia watakupatia chakula na mahali pa kulala kama unapaswa kusubiri kwa masaa mengi kabla ya kupanda ndege nyengine.
- Kama tayari umefika katika kituo chako cha mwisho, watakutunisha na wafanyakazi kutoka kwenye shirika la kutoa huduma za ndani ambao watakuwa wanakusubiri uwanja wa ndege.
- Wafanyakazi hawa watakupatia sehemu ya kukaa, kama vile kwenye apartment, nyumba au hoteli.
- Wakati mwingine unaweza kupewa makazi ya muda wa kukaa kwa siku chache au wiki kadhaa mpaka utakapohamia kwenye makazi yako ya kudumu.
- Wafanyakazi wa shirika la huduma pia watakusaidia katika kununua chakula na mavazi yako mwenyewe kwa msaada wa kifedha unaotolewa na serikali. Unaweza pia kupatiwa nguo za baridi.



- Wafanyakazi kutoka shirika la kutoa huduma za ndani watakusaidia:
 - o kuomba bima ya mkoa ya huduma ya afya;
 - o kutafuta daktari wa familia na daktari wa meno;
 - o kukupatia taarifa kuhusu mfumo wa shule na kusaidia katika kusajili watoto wako shuleni;
 - o kujaza fomu na maombi;
 - o kutafuta wakalimani na watafsiri;
 - o kukutana na watu mnaolingana kwenye vitu mpendavyo;
 - o kutumia benki, usafiri n.k
 - o kutathmini mahitaji yako na kukuelekeza wewe na familia yako kwenye huduma maalumu katika jamii; na
 - o kuboresha ujuzi wako wa lugha, kujiandaa na kutafuta ajira, na mengineyo.

Serikali ya Kanada itakupatia msaada wa awali kukusaidia kuanza maisha yako nchini Kanada. Lakini ni muhimu kwako kuwa na matarajio ya kiuhalisia.

Lazima uwe tayari kufanya kazi kwa bidii ili kufanikiwa sana katika maisha yako nchini Kanada.

Msaada wa kifedha kutoka serikalini ni wa muda wa mwaka mmoja tu kuanzia tarehe unayofika, au mpaka utakapoweza kujitegemea - chochote kitakachokuja kwanza. Unapaswa uweze kujikimu mwenyewe na familia yako baada ya mwaka mmoja.



Makazi na familia yako

Wewe na mke wako/mume wako, watoto wako wanaokutegemea, na watoto wako wanaokutegemea wenye watoto wanaowategemea, wanaweza kuomba pamoja kwenye fomu moja unayoomba ya uhamiaji na kuja Kanada pamoja.

Ikiwa kuna **mabadiliko yoyote** kwenye ndoa (kwa mfano, umeoa/ umeolewa au umeachika/umeacha kwa talaka), au kama utapata mtoto wakati wowote kabla ya kusafiri kuja Kanada, lazima uwataarifu UNHCR na maafisa wa Kanada. Ili wanafamilia wako wapya waweze kuingizwa kwenye maombi yako ya uhamiaji.

Ni **muhimu** sana kuwaambia maafisa wa Kanada kwamba mnataka kuishi kama familia. Ni lazima – uorodheshe wanafamilia wako wote kwenye maombi yako. Kama hutowaambia wafanyakazi wa Kanada kuhusu mke/ mume wako au mtoto wako kabla ya kuondoka kwenda Kanada, hutoweza kuwadhamini kuja Kanada hapo baadae.

Kama una ndugu au marafiki wa karibu ambao tayari wapo Kanada, na kama ungependa kuishi karibu nao, unapaswa kuwajulisha UNHCR na maafisa wa Kanada sasa hivi. Kadri iwezekanavyo, Kanada wanajaribu kuwapatia makazi wakimbizi kwenye jamii ambayo wanaweza kupata msaada kutoka kwa watu wanaowafahamu.

Unaweza ukawa umewaweka kwenye maombi yako wanafamilia wanaokutegemea ambao huendi nao Kanada. Mara ukishatulia Kanada, unaweza kuwaleta Kanada wanafamilia wako hawa kupitia mpango unaoitwa Fursa ya Dirisha la Mwaka Mmoja (One year Window of Opportunity – OYW). Unaweza kuomba ndani ya mwaka mmoja baada ya kufika kwako Kanada kumleta mke wako/mume wako, mwenza wako kisheria, mtoto anayekutegemea, au mtoto anayemtegemea mtoto wako anayekutegemea kukaa na wewe Kanada, kama tu waliorodheshwa kwenye maombi yako kabla hujaondoka kuja Kanada.

Wanafamilia wengine, kama vile wazazi, babu na bibi, au kaka na dada, watapaswa kutuma maombi yao peke yao ili wazingatiwe kwenye kupatiwa makazi. Mara ufikapo Kanada, unaweza kudhamini wanafamilia kuhamia Kanada kama utakidhi [vigezo kadhaa](#). Vyovyote vile, hatua za kuleta wanafamilia hawa Kanada inaweza kuchukua muda mrefu, na unaweza usiione familia yako kwa miaka kadhaa.

Uhamiaji, Wakimbizi na Uraia Kanada (Immigration, Refugees and Citizenship Canada – IRCC) hawatachangia kusafirisha wanyama labda kama kuna mnyama anaetoa huduma ambapo kuna sababu za kisheria zinazoonyesha sababu ya kumsafirisha kuja Kanada. Wakimbizi lazima wafanye wenyewe utaratibu wa kusafirisha wanyama wa nyumbani.



Hali yako ya uhamiaji

Unapofika Kanada, utapewa hati inayoitwa Uthibitisho wa Makazi ya Kudumu (Confirmation of Permanent Resident – COPR) inayosema unaweza kuishi hapa kama mkazi wa kudumu. Hii ina maananisha kwamba kisheria unaweza kukaa Kanada maisha yako yote. Utaweza kufanya kazi au kwenda shule.

Kuna masharti maalumu ya muda gani unapaswa kuishi, na kuwa Kanada kabla ya kuomba uraia wa Kanada. Utakapokidhi masharti yote, unaweza kuomba kuwa raia wa Kanada.

Taarifa zaidi zinapatikana kwenye <https://www.canada.ca/en/immigration-refugees-citizenship/services/canadian-citizenship/become-canadian-citizen.html>.

Utaishi wapi Kanada

CKanada ni nchi ya pili kwa ukubwa duniani, yenye miji mingi lakini pia kuna maeneo mengi ambayo kuna watu wachache au hakuna watu wanaoishi. Miji mingi mikubwa iko sehemu ya kusini mwa Kanada, karibu na mpaka wa Marekani.

Maeneo mengi ambako watu wanaishi yapo mbali mbali na huchukua muda mrefu kufika huko, hata ukisafiri kwa ndege. Kwa mfano, umbali kati ya miji mikubwa ya Kanada, Toronto na Vancouver, ni zaidi ya kilomita 4,300, au karibu siku 3 kwenda na basi.



Unaweza kupatiwa makazi kwenye moja ya miji kadhaa. Ikiwa una watu unaowafahamu au wanafamilia Kanada, tutajaribu kukuweka wewe na familia yako katika mji ambao upo karibu nao kadiri iwezekanavyo. Hata hivyo safari yako ya mwisho itategemea mambo mbalimbali, ikiwa ni pamoja na huduma maalumu zinazohitajika, upatikanaji wa makazi, huduma za jamii, na ukubwa wa familia yako.

Kama jamaa zako au watu wako wakihamia mji mwingine Kanada, tafadhali ifahamisha Idara haraka iwezekanavyo.

Ingawa utakuwa huru kuhamia mahali pengine Kanada, tunakuhamasisha kukaa mahali pamoja angalau kwa mwaka mmoja. Hii itakuwezesha kufaidika na huduma ulizopangiwa.



Jamii ya Kanada

Kanada, wanaume na wanawake ni sawa. Wana haki sawa na wanahudumiwa kwa kiwango sawa cha heshima. Wanaume na wanawake wa tabaka zote za jamii, tamaduni, kabila na dini wanashirikiana na hutendewa sawa.

Upo huru kuzungumza maoni yako nchini Kanada, wakati ukiheshimu haki ya wengine kufanya hivyo.

Kuna makundi mengi ya jamii na vyama vya wanaume, wanawake na watoto ambavyo unaweza kujiunga navyo. Unaweza kushiriki katika shughuli za michezo kama vile soka au kuogelea, na kuna shughuli nyingi ambazo unaweza kufanya kama familia. Baadhi ni bure, wakati nyengine ni za kulipia.

Unaweza kuwa umezowea kuwa pamoja na familia yako yote kwa ajili ya kukusaidia. Mara utakapokuwa Kanada, unaweza kujihisi mpweke, lakini huko peke yako. Kama una maswali, wasiliana na moja ya mashirika yanayotoa huduma au ongea na mtu kwenye jamii yako. Kuna watu hapa ambao wanaweza kukusaidia uzowee maisha nchini Kanada.

Kama kuna mikutano ya wageni katika eneo lako, jaribu kuhudhuria. Hii itasaidia kupata marafiki kwenye jamii na kukusaidia kufahamu huduma katika eneo lako.



Sheria za Kanada

Sheria za Kanada zinatambua na kulinda haki za msingi na uhuru wa kila mtu, ikiwa ni pamoja na uhuru na usawa. Mkataba wa Kanada wa Haki na Uhuru ni sehemu ya katiba ya Kanada. Inakulinda mara tu ufikapo Kanada.

Tambua kuwa kuna baadhi ya vitendo ni kinyume cha sheria nchini Kanada ambavyo vinaweza kuwa si kinyume na sheria nchini kwako unapoishi. Ni kinyume cha sheria na ni kosa la jinai kupiga mwanamke au mtoto, kuacha watoto bila ya uangalizi wa mtu mzima, kuendesha gari bila ya bima au leseni, au kwa watoto wadogo kusafiri kwenye gari bila ya kiti cha gari. Pia ni kinyume cha sheria kujisaidia hadharani haja ndogo au haja kubwa, hata hivyo kuna vyoo vingi vya bure katika maeneo mengi.

Kwa taarifa zaidi za sheria za Kanada na mfumo wa haki zinapatikana kwenye tovuti ya Serikali ya Kanada [ukurasa wa tovuti](#).



Lugha

Kanada kuna lugha mbili (2) rasmi: Kiingereza na Kifaransa. Ni muhimu kufahamu Kiingereza au Kifaransa ili kukusaidia kuishi Kanada.

Kiingereza ni lugha inayozungumzwa zaidi katika mikoa na wilaya nyingi. Kifaransa ni lugha kuu inayozungumzwa Quebec, ingawa kuna jamii za Kifaransa katika mikoa yote na maeneo yote nchini Kanada. Pia kuna wakazi wachache ambao wanazungumza Kiingereza Quebec.



Kiingereza au Kifaransa kizuri kitakusaidia kupata kazi, kwenda shule, kupata huduma na kupata marafiki. Kama inawezekana, jaribu kuboresha Kifaransa au Kiingereza kabla ya kuja Kanada.

Mara ufikapo Kanada, unaweza kujiunga na madarasa ya bure ya lugha yanayofadhiliwa na serikali bila ya gharama yeyote. Mashirika ya kutoa huduma yanaweza kukusaidia kutathminiwa viwango vyako vya lugha na kukusajili kwenye programu za mafunzo ya lugha.

Kutafuta kazi

Ingawa wewe na familia yako mtapata msaada wa kifedha kwa mwaka wako wa kwanza nchini Kanada, ni vizuri kujiandaa kutafuta kazi ili uweze kujikimu wewe na familia yako.

Kadri unavyozungumza Kiingereza au Kifaransa vizuri, itakuwa rahisi zaidi kupata kazi. Kazi nyingi zilizopo na biashara zinahitaji:

- kuzungumza Kiingereza au Kifaransa vizuri,
- kuwa na ujuzi mkubwa wa kazi zote zinazohusiana na lugha, na
- kuelewa maneno au misemo inayotumiwa, ambayo baadhi yake inaweza kuwa ya kipekee kwa Kanada tu.



Kama unaweza, jaribu kutambua mahitaji ya lugha yanayohitajika kufanya kazi kwenye fani yako. Mara ufikapo Kanada, watoa huduma hutoa mafunzo ya taarifa bure na huduma binafsi ili kukusaidia kupata kazi na kukuandikisha katika madarasa ya lugha.

Kama una shahada ya chuo kikuu, diploma ya chuo au cheti cha biashara, kinaweza kisikubalike Kanada. Itakuwa ni juu ya serikali ya mkoa au bodi ya udhibiti ya sehemu ambayo utakaa kuamua kama shahada /cheti au hati nyingine zinatambulika. Watoa huduma pia wanaweza kukusaidia kukuongoza katika mchakato huu.

Kujitolea pia ni njia nzuri ya kupata uzoefu wa kazi wa Kanada. Ingawa ukijitolea hulipwi, hii itakusaidia kuboresha ujuzi wako wa lugha na unaweza kupata ujuzi muhimu wa kuomba kazi. Pia ni njia nzuri ya kupata marafiki na kukutana na watu katika jamii yako.



Huduma za makazi

Huduma za makazi zinafadhiliwa na Uhamiaji, Wakimbizi na Uraia Kanada - IRCC (na Ministère de l'Immigration, de la Diversité et de l'Inclusion ya Quebec) na zinapatikana kwa wakazi wote wa Kanada wa kudumu, ikiwa ni pamoja nawakimbizi waliopatiwa makazi. Huduma hizi ni bure na zinaweza kukusaidia kujiandaa vizuri na maisha nchini Canada.

Kuna huduma nyingi kwenye mtandao za kujiandaa na safari kwenye tovuti ya [Uhamiaji, Wakimbizi na Uraia Kanada](#) (IRCC) kukuandaa kwa maisha yako Kanada. Unaweza kupata huduma hizi mara tu utakapothibitishwa kwamba maombi yako yamekubalika.

Mara tu ufikapo Kanada, wataalamu wa makazi watakupatia huduma mbalimbali za bure ili uweze kuishi nchini Kanada. Hizi ni pamoja na msaada wa kutafuta kazi, mafunzo ya lugha, mafunzo maalumu ya kazi, huduma kwa vijana na wazee, na zaidi.

Orodha kamili ya huduma za makazi zinazodhaminiwa na Uhamiaji, Wakimbizi, na Uraia Kanada (IRCC) inaweza kupatikana [mtandaoni](#).

Matumizi

Utapatwa msaada wa kifedha kutoka serikali ya Kanada (au mkoa wa Quebec) kwa muda wa miezi 12 kuanzia siku utakayoingia Kanada, au mpaka utakapoweza kujitegemea - chochote kitakachoanza kwanza.

Mara msaada huu utakapoisha, utakuwa na jukumu la kulipia gharama zako mwenyewe, ikiwa ni pamoja na chakula, pango, umeme, maji, nguo na kodi. Ni muhimu kujifunza namna ya kuipangia matumizi hela yako.

Kama hutoweza kupata kazi baada ya miezi 12 na unahitaji msaada kusaidia familia yako, kuna aina mbalimbali za huduma za jamii, kama mabenki ya chakula na mashirika ya msaada kwa mahitaji hayo. Pia kuna programu za misaada mbalimbali ya kifedha inayotolewa na serikali kwa watu wanaohitaji, hata hivyo ni lazima uwe na vigezo fulani ili kufaidika na programu hizi.

Unaweza pia ukataka kutuma fedha kwa familia yako nyumbani, upo huru kufanya hivyo, lakini watu wengi wanashindwa kujikimu wenyewe na bado wana pesa ya kuwatumia familia. Nchini Kanada, vitu vingi vinaweza kuhitaji fedha zaidi kuliko ulivyozowea kulipia. Kumbuka kwamba itachukua muda kuzowea maisha mapya ya Kanada.



Shule

Hutolazimika kulipia watoto wako kwenda shule ya msingi au sekondari. Watoto wote kati ya miaka 6 na 16 ni lazima waende shule. Ni sheria. Wanafunzi wengi huhudhuria shule ya sekondari mpaka wanapohitimu diploma (wakiwa na miaka 18).

Baada ya kumaliza shule ya sekondari, watoto wako wanaweza kwenda chuo kikuu au chuo. Chuo na chuo kikuu ni gharama, lakini chuo au chuo kikuu wanaweza kuwa na rasilimali za kuwasaidia kupata udhamini, ruzuku au mkopo wa mwanafunzi.



Afya na huduma za meno

Kama mkazi wa kudumu wa Kanada, huhitajiki kulipia huduma nyingi za afya, ikiwa ni pamoja na kwenda hospitali au kumuona daktari.

Unapofika Kanada, utapatiwa bima ya Programu ya Afya ya Mpito ya Serikali (IFHP). Bima ya IFHP inatoa huduma muhimu za afya (ikiwa ni pamoja na kumuona daktari au kwenda hospitali) mpaka utakapoweza kupata bima ya mkoa au wilaya husika, ambayo inapatikana hasa ndani ya ya miezi mitatu (3). Wakati huu, ni lazima uombe bima ya afya kwenye mkoa au wilaya unayoishi.



Ni muhimu kuwakilisha nyaraka zako za kustahiki IFHP kwa mtoa huduma wa afya kila wakati unapoenda kumuona. Unaweza kupata huduma za afya mahali popote Kanada kutoka kwa mtoa huduma yoyote wa afya ambaye amesajiliwa. Orodha ya watoa huduma waliosajiliwa inapatikana [mtandaoni](#) chini ya orodha ya "Tafuta Watoa huduma IFHP".

IFHP pia wanatoa bima za dawa na bima za ziada, ili kushughulikia mahitaji mbalimbali ya dharura na huduma za afya za msingi (kwa mfano, huduma za afya ya akili, baadhi ya huduma za macho na huduma ya haraka ya meno kwa ajili ya kupunguza maumivu na maambukizi). Bima za dawa za ziada na za kuandikiwa zinatolewa endapo tu kama unapokea msaada kutoka Programu ya Msaada wa Makazi – Resettlement Assistance Program (au inayofanana na hiyo ya Quebec).

Muhtasari wa faida zote za IFHP na huduma zinapatikana kwenye tovuti ya [Uhamiaji, Wakimbizi na Uraia Kanada](#) (IRCC)

Watoa huduma wanaweza kukusaidia kuchagua daktari wa familia, kutafuta daktari wa meno, na kukuunganisha kwenye ushauri wa afya ya akili na maumivu sugu itakapohitajika.

Kila mkoa na wilaya wana programu yao ya bima. Hakikisha unafahamu bima yako inalipia nini. Watoa huduma pia wanaweza kukusaidia kuomba hati muhimu zinazohitajika utakapofika Kanada.

Wakimbizi ambao ni wapya Kanada mara nyingi wanajisikia upweke na kutengwa, na wanaweza kuwa na msongo wa mawazo kutokana na maumivu ya matukio ya zamani. Kuna huduma nyingi za bure na watu waliofundishwa kuzungumza wanaoweza kukusaidia kuondoa maumivu yako. Kama unatafuta msaada, muulize mtoa huduma wa shirika kuhusu huduma za afya na ushauri wa akili zinazopatikana kwa ajili yako.

Chanjo

Kupata chanjo dhidi ya ugonjwa ni njia mojawapo na salama ya kuzuia magonjwa, matatizo ya matibabu na kifo cha mapema.

Chanjo inafanyakazi kwa kusaidia kujenga mfumo wa kinga wa mwili wako. Kama dawa zote nchini Kanada, chanjo zimepita mchakato kamili wa kuzithibitisha na kuzipitisha kabla ya kutolewa kwa umma.

Jopo la madaktari wanaweza kukupa chanjo kusasisha hali yako ya chanjo wakati wa uchunguzi wa matibabu ya uhamiaji, kabla ya kufika Kanada. Huduma hizi ni za hiari. Ikiwa utachagua kupata chanjo nje ya nchi, unapaswa kuleta rekodi yako ya chanjo Kanada.

Mara ufikapo Kanada, chanjo nyingi zinalipiwa na programu yako ya bima ya afya ya mkoa au wilaya. Wewe na familia yako mnaweza kuwa na magonjwa ambayo chanjo inaweza kuyazuia, hasa kama hukuwahi kupatiwa chanjo. Watoto wachanga na watoto wadogo wanaweza kuambukizwa magonjwa kadhaa ambayo yanaweza kuzuilika, na baadhi ya maeneo ya Kanada, watoto wanahitaji kupatiwa chanjo zao zote kwa wakati uliopangwa kabla ya kuanza shule au huduma ya kuangaliwa kwa siku.

Watoa huduma, madaktari au kliniki ya afya wote wanaweza kutoa maelezo zaidi kuhusu jinsi ya kusasisha hali yako ya chanjo.

Ni uamuzi binafsi wa kuamua mwenyewe na / au familia yako kupata chanjo. Lakini kumbuka: unapopata chanjo, unajilinda wewe na wengine dhidi ya magonjwa maalumu na kusaidia kuzuia kuenea kwa magonjwa kwa wale ambao wapo hatarini zaidi.

Chakula na maji

Maji nchini Kanada ni salama kwa kunywa. Kila nyumba ina maji yake ya moto na ya baridi. Unaweza kupata maji wakati wowote mchana au usiku.

Vyakula mbalimbali vinavyopatikana kununua itategemea na jamii yako. Miji mikubwa, tofauti ya Kanada itakuwa na vyakula vingi ambavyo unakula kwa kawaida, wakati jamii ndogo zinaweza kuwa na machaguo machache.

Watu kutoka makabila mengi wanaishi Kanada, hivyo inamaanisha kuna vyakula vingi mbalimbali kutoka tamaduni nyingi, na unaweza kupata maduka maalumu kwa bidhaa maalumu za chakula. Baadhi ya vyakula vingine vinaweza kuwa ghali zaidi kuliko ulivyozowea kutokana na hali ya hewa ya Kanada na mahitaji ya kuagiza baadhi ya vyakula .



Dini

Dini nyingi zipo Kanada. Upo huru kuabudu dini yako. Sheria ya Kanada inataka uheshimu watu wanaoabudu dini tofauti. Hutoombwa wala kulazimishwa kubadilisha dini yako. Uhuru wa dini ni mojawapo ya haki za msingi Kanada.

Ingawa mashirika mengi yanayotoa huduma yanahusishwa na vikundi vya imani, unaweza kuendelea kuabudu dini yako. Watu hawa wanataka kukusaidia kuja Kanada na kujumuika vizuri, bila ya kipingamizi.



Hali ya hewa

Kuna misimu minne (4) tofauti nchini Kanada: vuli, majira ya joto, kipupwe na majira ya baridi. Kanada ni nchi kubwa sana na hali ya hewa kila msimu inaweza kuwa tofauti kutoka sehemu moja ya nchi hadi nyingine.

Vuli (Machi, Aprili na Mei) ni msimu wa mvua katika sehemu nyingi za Kanada, na hali ya hewa inaweza kuwa ya baridi. Katika majira ya joto (Juni, Julai na Agosti), hali ya hewa ni joto sana katika maeneo mengi ya nchi. Wakati wa mchana, joto mara nyingi huwa ni zaidi ya 20°C na mara nyingi huongezeka juu ya 30°C.



Wakati wa kipupwe (Septemba, Oktoba na Novemba), hali ya hewa ni baridi na pia kunaweza kuwa na mvua nyingi. Katika miezi ya baridi (Disemba, Januari na Februari) ni baridi sana katika maeneo mengi, na joto mara nyingi huwa ni chini ya 0°C. Theluji hufunika ardhi kuanzia Disemba hadi Machi au Aprili. Kusini magharibi mwa British Columbia (karibu na Victoria na Vancouver), katika kipindi cha majira ya baridi ni kawaida kuwa na mvua kuliko theluji.

Kulingana na wapi unatoka, kwa mara yako ya kwanza, unaweza kushangazwa sana na baridi na theluji wakati wa baridi Kanada. Ukiwa na mavazi yanayostahiki, utakuwa tayari kufurahia uzuri wa kipekee wa baridi ya Kanada. Inategemea ni wakati gani utafika Kanada, unaweza kupewa nguo za baridi wakati utakapofika. Watoa huduma wanaweza pia kukusaidia kununua kofia, buti, glovu na makoti ya baridi kwa ajili ya familia yako.

Maneno ya mwisho ya ushauri

Kuanza maisha mapya nchini Kanada kunasisimua na kuna fursa nyingi mpya. Hata hivyo kutakuwa na changamoto pia. Baadhi ya watu huwa ni vigumu kuzoea. Huchukua muda, hivyo jaribu kuwa mvumilivu. Kumbuka kwamba wageni wengi kama wewe wamezoea na wamejumuika kikamilifu na jamii ya Kanada.

Kuna watu na huduma zinazopatikana kukusaidia. Watoa huduma wanapatikana kujibu jambo lolote au maswali utakayokuwa nayo. Wanaangalia sana maslahi yako zaidi. Unaweza pia kuwasiliana na ofisi za [Uhamiaji, wakimbizi na Uraia Kanada](#) (IRCC) kwa maswali kuhusu maombi yako.

Vyanzo vingine vya rasilimali ni pamoja na vikundi vya jamii, makundi ya dini na huduma za ushauri. Makundi haya yote yana uzoefu wa kuwasaidia wageni kuzoea kwa njia tofauti. Usiogope kuomba msaada.

Ukifikia hatua unaamini umetendewa visivyo au kudhulumiwa, tafadhali wasiliana na Uhamiaji, Wakimbizi na Uraia Kanada (IRCC) haraka iwezekanavyo kwenye IRCC.INPSR-PPPRRI.IRCC@cic.gc.ca.

Hakuna hatari ya kufutiwa hali yako ya ukaazi kwa kuwasiliana na Uhamiaji, Ukimbizi na Uraia Kanada (IRCC).

Mwisho, kuna tovuti zenye taarifa nyingi zaidi za kukusaidia kujiandaa. Tovuti za majimbo zina taarifa nyingi muhimu, ikiwa ni pamoja na maswali yaulizwayo mara kwa mara, viunganisho vya jamii, habari na matukio.

Tovuti ya Serikali ya Kanada ina maelezo zaidi juu ya maisha ya Kanada, orodha na ramani ya mashirika ya huduma za makazi katika jamii zote nchini, taarifa kuhusu tathmini za bure za lugha, na rasilimali za ziada za kujiandaa kwa ajili ya safari yako ya kuja Kanada.

www.canada.ca/immigration

